



Komunika Imprensa

Periodu: Feveiru 2012

Edisaun: 13 Feveiru 2012

Parlamentu Nasionál sei Aprova Lei Reparasaun no Institutu Memória Públiku antes termina sira nia mandatu

Iha loron 10 Feveiru 2012, *Judicial System Monitoring Programme* (JSMP) hetan oportunidade hodi marka audiéncia ho Prezidénte Parlamentu Nasionál Sr. Fernando Lasama de Araújo iha nia hela fatin Farol Dili.

Audiéncia ne'e realiza relaciona ho pedidu husi JSMP atu deskuti konabá esbosu Lei Reparasaun no Institutu Memória Públiku ne'ebé kontinua pendente iha Parlamentu Nasionál.

Iha oportunidade ne'e Prezidénte Parlamentu Nasionál promete katak, nia sei halo esforsu atu koalía no aprosima membru parlamentu sira hanesan opozisaun no Aliansa Maioria Parlamentu (AMP) atu aprova esbosu Lei Reparasaun no Lei Institutu Memória Públiku antes parlamentu ne'e hakotu sira nia mandatu iha tinan ne'e nia laran.

Prezidénte Parlamentu Nasionál haktuir katak antes sira remata sira nia mandatu lejislativu iha Maiu 2012, nia sei esforsu atu finaliza debate no aprova ba lei pendente sira, inklui esbosu lei rua ne'ebé ligadu ho direitu vítima sira iha krime pasadu nian.

Diretór JSMP, Luis de Oliveira Sampaio *haktuir katak JSMP rekoñese esforsu no produtividade servisu Parlamentu Nasionál durenta periodu lejislativu ida ne'e, tanbá debate no aprova lei bar-barak, maibé JSMP observa katak iha lei importante rua ne'ebé ligadu ho krime violasaun direitus umanus pasadu nian ne'ebé sei kontinua pendente to'o ohin loron. Tanbá ne'e JSMP enkoraza Prezidente Parlamentu Nasionál atu lori fila esbosu lei rua ba agenda hodi debate no aprova antes Parlamentu Nasionál konklui nia mandatu.*

JSMP mós rekoñese katak aktualmente deputadu sira Parlamentu Nasionál okupadu ho agenda polítika ba kampaña ba eleisaun presidencial no parlamentar nian maibé se Parlamentu Nasionál konsege debate no aprova lei rua ne'e, sei produz sentidu diferente vítima sira ne'ebé simu konsekuensia durante konfliktu no sai alvu ba militar Indonézia nian durante okupasaun Indonézia.

Ba JSMP, Prezidente Parlamentu Nasionál, konfirma katak tuir lolos, ladun iha problema sériu atu debate no aprova lei rua ne'e tanbá antes ne'e esbosu lei rua refere tama ona iha agenda atu deskuti no aprova. Maibé tanbá iha diferensia opiniaun konabá lei rua ne'e, no liu-liu tanbá mesmu nia lidera meja Prezidente Parlamentu Nasionál, maibé la'os lidera ho maioritariu, tanbá ne'e persiza halo loby ho deputadu ida-idak atu hetan sira nia partisipasaun.

JSMP espera katak, atraves husi audiénsia ne'e bele enkoraza deputadu sira iha Parlamentu Nasionál konsidera importansia husi esbosu Lei Reparasaun no Institutu Memória Públiku atu debate no aprova. Tanbá ne'e hatudu katak deputadu sira hanesan polítiku no representante povu iha Uma Fukun Parlamentu Nasionál preokupa no solidariu ho vítima sira nia terus no sofrémentu ne'ebé sira simu tanbá konsekuensia luta ba independensia ne'ebé ita atinze ona.

Ikus liu JSMP mós agradese tebes ba Prezidente Parlamentu Nasionál Fernando Lasama de Araújo ne'ebé disponivel hodi simu equipa JSMP no dezeju susesu ba nia kandidatura iha elisaun prezidensial ba períodu 2012-2017.

Iha tempu hanesan JSMP hamutuk ho Grupu Servisu ba Justisa no Reparasaun hala'o mós audiénsia konabá asuntu Lei Reparasaun no Institutu Memória Públiku ho Mgr. Don Alberto Ricardo da Silva no Vigariu Jerál Mgr. Apolonario Guterres iha Dioseze Dili.

Atu hetan informasaun kle'an favor kontaktu direktamente :

Luis de Oliveira Sampaio
Direitór Ezekutivu JSMP
Direasaun e-mail: luis@jsmp.minihub.org
Landline: 3323883